




蜀輶日記卷三



安化陶

澍雲汀



八日午刻啟行出東門各官祖送於真武廟旋登舟  
過安順橋又過九眼橋或曰九眼卽萬里橋其南門  
外之萬里橋本名江橋云西岸有白塔登之可肆觀  
覽舊有合江亭錦江與流江會於此江水自灌縣都  
江堰分流而下其東北去者曰沱以次會湔濛綿雒  
至瀘州入江者也其東南流者繚繞於崇寧郫縣温  
江新繁成都華陽境內名目不一或稱郫江又曰都  
江曰錦江曰流江曰清遠江曰石犀江曰走馬江曰

油子河亦稱內江外江又稱府江記載紛紜隨地異名郫江其統稱也大支有二一由成都城北爲流江一由成都城南爲錦江史記謂李冰穿二江成都中括地志謂二江合於城之東南岸曲有合江亭是也又南入於大江寰宇記二江合流亦名錦江蓋錦江之稱較郫流尤著也同年司卓二君追送至薛濤井畔復泊舟留連久之偕行者同郡胡光瓚賀懋椿兩明府是夕宿中和場共行二十里華陽縣地十九日乘流南下俯視清波宛然瀟湘間石子如樗蒲可數人煙平遠尤有畫意十里桐子場十里中興場

二十里傅家壩其西爲雙流縣地左思賦帶二江之雙流是也二十里古佛洞山勢回抱上有石堰相傳開堰時得一石佛嵌尸祠之因名二十里黃龍溪建安末黃龍見此有水東北從仁壽縣來注之謂之赤水也又湔壩由離堆東下歧爲數十股自雙流而南皆以次會於新津古今集記李冰鑿離堆避沫水穿三十六江灌溉川西南稻田堤堰志云冰鑿離堆於江中設象鼻七十餘丈指水十二座大小釣魚護岸一百八十餘丈橫瀦洪流曰都江堰以分岷江之水北折而東灌田億萬計蜀用富饒沃野千里謂之天

府冰又大書深淘灘淺作堰六字留爲治水之法神禹而下斯爲奇績宜其廟食灌口矣三十里泊江口彭山縣地西岸則新津縣地岷江發源番地羊膊嶺至黃勝關入邊經松潘茂州汶川凡千餘里至灌口分爲湔堰其正流從灌縣經崇慶新津而東至江口與府江會其流始大有滌洞澎湃之勢按大江稱岷江一稱汶江又稱導江其上游曰玉輪江至汶川曰阜江至灌曰沫江一曰瀆江隨地變名古謂之外水也明末張獻忠亂蜀鎔括民金銀載以東下將變名爲商賈桂王將嘉定伯楊展邀擊於江口大破之沈

其舟獻賊遁走西充適遇我朝肅親王豪格射殺嚮其尸展追至漢州而還尋亦爲賊降將袁韜武大定所害今江口居民每於波底網獲銀錠乾隆六年二月川督孫士毅奏請淘採純廟以非政體飭罷其役

二十日自江口十里過彭山縣秦置武陽縣漢建元中由犍道移犍爲郡治此唐改彭山縣因縣後彭亡山得名元和志周末彭祖家於此而亡遂葬焉後漢岑彭擊公孫述至此聞山名惡之改曰平無會日暮不果徙其夜爲刺客所殺此山一名平模又曰彭模蓋

與平無音相近也江水經城北古謂之魚鳧津蜀本紀謂彭祖生此又縣東北有象耳山古蹟志謂上有彭祖宅彭祖封於大彭在今江南之徐州所謂彭城也而蜀中有彭山彭水皆以彭祖爲辭且彭祖商賢而謂周末家此卽蘇轍詩亦有猖狂戰國古神仙曳尾泥塗老更安之語豈孔子言竊比老彭時其人尙存耶旣存何以入蜀入蜀何以便亡語近無稽而取以名縣於義似未安也彭山有龍爪鼓樓二灘尙不甚險二十里蟆頤堰入眉州界二十里泊眉州南揖大峩北枕長江川原平曠古名州也三蘇故宅今爲

書院問及州境無一蘇姓者蓋東坡頴濱宦游未歸子孫世居汝頴故鄉坵墓遂無主者老泉墳塚亦失明嘉靖中州守楊秉和徧索始得之於石龍東岸柳溝山中構祠以守云大江流經州境墓頤山下玉色瑩然因名玻瓈江亦曰墓頤津其墓頤堰爲唐刺史章仇兼瓊所開溉田七萬餘畝魏了翁守州時又畚武陽石壘隄至今利之又有松江其上流自新津口引江爲渠謂之通濟堰南流彭眉之間溉田數千頃亦章仇兼瓊所開五代時張琳擴之引其流合於松江繚繞州城又南合醴泉雙河之水入於江

二十一日晨發二十里太和場二十里張家坎十五里  
紅花堰卽古鴻化堰唐太和中榮縣夷人張武等請  
田於青神鑿山醜渠漑田數百頃蜀記青神陂堰五  
十有一以鴻化爲最大云五里羅漢場東望岡巒巋  
起蓋井研諸山從象耳墓頤大旺而南連峯競秀屹  
立江東壯觀也二十里青神縣西魏之青衣縣也取  
蠶叢氏青衣勸農桑爲名舊隸眉州康熙中析置地  
狹而瘠遠不逮眉有芙蓉溪五渡溪在縣東入於江  
是夕泊象鼻子去縣五里

二十二日早發象鼻子灘聲頗壯十里劉家場十五里

鴨婆灘入樂山界十五里正陽關五里入平羌峽兩  
岸石峯峻起古藤蔓延望之森然水經注江水逕南  
安縣西有熊耳峽連山競險接嶺爭高殆指此凡十  
五里出峽至板橋溪十里荔枝灣有荔枝樹大數抱旁  
枝拱矗皆數百年物其葉有青綠碧白每開花結果  
則東西南北四年而一周亦一異也三十里泊嘉定  
府樂山縣漢南安地華陽國志南安治青衣江會蜀  
王開明氏故治也公孫述據蜀惟青衣不服世祖嘉  
之安帝時青衣王子慕漢制上書求內附因賜名漢  
嘉後周改平羌郡隋唐爲嘉州郡據山水之會雄秀

甲於川南青衣江水自夾江縣西來大渡河水自峩  
嶓縣南來同會於郡治西南之雙湖又東流繞城隅  
而北入於岷江三江會合古有合水之稱晉書桓温  
討李勢循外水西上勢遣李福拒温自山陽即峩嶓山之陽  
趨合水是也按青衣江源出雅州之蒙山在蘆山縣界經  
名山洪雅丹稜青神夾江至樂山即古沫水也以其  
源出蒙山故又謂之濛水耳大渡河一名羊山江源  
出茂州西南徼外之羊山一名鐵豹嶺即岷山之別  
名也本與大江同出而大江東流在岷山之陰大渡  
南流在岷山之陽故又曰陽江也其水自打箭爐入

越雋有羅羅河魚洞河注之又東至清溪縣界經鬼  
皮落野夷入峩眉界而三峩之水入之故許慎謂之  
泝水漢地理志又謂之泝水泝即泝也殆傳寫之悞  
大渡河下流稱陽江亦曰沫水沫者水石相激噴薄  
如吐沫也大約蜀中灘險之水皆可稱沫不特青衣  
大渡可稱即大江亦然傳言李冰鑿離堆避沫水之  
害是江至灌口亦稱沫也此二水爲禹貢所不載源  
流旣遠名目互異記載紛紜無所折衷輒爲論之於  
此又按大渡自入中國過郡三行二千餘里始至嘉  
定其源本與江同而復會故疑此水即禹貢沱潛旣

道之沱矣否則此水與大江相表裏不應禹迹不到也署郡守徐世鉅來約以翌日游凌雲山諾之

二十三日晨從津口登岸有水西南來注江曰竹公溪入嘉定城經高望山下嶷然秀出學宮趾其北旁卽丁東院荒隘不可人有井一泓瑩瑩如小槽黃山谷更名爲方響洞者也過郡署旋出城謁禹王宮循城抵高北門江水捍岸雪花噴起薄女牆上鞞然有聲由小徑至泌水院院創宋時祀李冰與其子二郎水經注言冰鑿離堆門殺江神蜀人慕之壯健者稱冰兒今什邛縣高境關外雒水分流處有大郎廟又彭

縣彭門山下雁江分流處有三郎鎮意冰諸子各分地段治水而灌口之功二郎尸之故其名尤著也院左有軒翼然絡以池雜植荷芡泉脈自山根出宛有濠濮間意小憩片時復登舟北渡凌雲隸人執旗鑼導從麾出之同行一守四令及史君與門人章生抵岸見石上篙眼厯厯如蜂窩犇湍入之猶能作洄漩肩輿過小石梁壁間鐫佛像無數曲徑如梯皆剗石爲級十步一折遂舍輿而徒稍及山腰曰潮音洞竹樹蒙密水聲礮脚底甚壯路至此頗夷然率剗石腹繚而行外欄以石上覆如厂懸崖鐫東坡載酒時游



處七字又有集鳳峯三大字按凌雲山一名九頂山  
集鳳其一也其餘栖鸞靈寶就日丹霞祝融擁翠望  
雲兌說岡巒相屬不甚可辨由潮音洞至山門半里  
許皆詩龕漁洋所賞安磐二絕句亦在焉章生云安  
磐夾江人官給事中與楊升菴相善云山僧迎門弗  
暇入入寺右菜畦踏以北壘石成垣竅其中爲門出  
石垣西有二石屋穴山腹卽宋州守吳秘治易洞遙  
望龍泓山翠岫環立奧如亦曠如也其西白塔立高  
阜僧云已頽不可登稍北曰丹峽取舊徑過石垣穿  
竹磴而上數百步至高峯觀爲凌雲最高處同游者

俱集登樓拜東坡像史君疑焉蓋東坡早歲讀書此  
山故像作少年無髯與他處所刻畫有異樓之前爲  
東坡洗墨池有亭曰清音東坡手書也廉訪某者易  
之爲橫山堂邵博作記謂小人無忌憚復取舊榜懸  
之並刻諸石此其遺趾然坡書已不可得見矣州守  
設劇亭中辭之無及少坐復起循亭而左得石磴螺  
旋下凡百餘步一石筓山溜甚冽有海師洞刻石作  
像碑文頗可觀而刊其名僧云其人曾官嘉州多穢  
迹故爲遊者所劖刻石好名杜元凱不免而累石受  
劖有文無行者戒諸大佛像在其南卽海師所鑿也

方輿勝覽唐開元中僧海通於瀆江沫水濛水三江之會悍流怒浪之濱鑿山爲彌勒大像高三百三十尺至韋臯時積十五年而工始備舊有七層閣明末燬於賊今石上柱碣梯磴痕宛然大佛像以山頂爲髻脚踏江水兩壁侍天王像亦高與山齊狂瀾吼哮直射其下如百萬甲兵聲隆隆動地坡詩奔騰過佛脚不虛也跌坐競秀亭西望眉雅東望瀘戎江山環繞天然圖畫三峩南岷雲中時露一斑如海上神山可望而不可卽烏尤在左側單椒特立儼若凌雲之後勁稍東卽馬鞍山也臨眺移時心目爲一爽同游

踪至促入席暢飲而返是夕江水忽漲抵南岸已二鼓矣

二十四日署守徐君復邀登府署桂花樓山川風景四顧在目有橫榜書題作西南第一樓七字陸放翁句也樓下竹石羅列頗有曲折旁搆小亭前守謝肇洙題楹云吾名吾亭處處皆題喜雨有客有酒時時如在凌雲亦見佳致申刻解纜倏忽已過佛脚仰視巖像尤儼然舟人以日將暮水峻不可行遂泊杜家場北對烏尤山嵐光翠色俯拾卽是方輿勝覽烏尤在九頂之左舊名離隼山突然於水中如犀牛然一名

烏牛山山谷始謂之烏尤卽古青衣山也上有烏尤寺曠怡亭相傳郭璞注爾雅處子由詩區區辨蟲魚爾雅細分縷是也杜家場去嘉州城五里溯流非半日不能至蓋三江合流建瓴而下盤渦激射湍悍異常行者危之

二十五日晨霧舟人呼爲罩子已刻開行二十五里牛華溪有鹽場交犍爲界十里老木孔南岸石壁陡起坎其半爲路以通緯水流湍急頗險十里竹根灘灘下卽五通橋一曰四望關此處有山高聳可以四望故名有水自北來入於江犍爲鹽所從出也犍爲又

有火井出泉如油以竹筒盛而然之可代燈燭丹鉛錄謂明正德中始出與邛州之火井相似蓋積陽之氣所產固非怪異十里鐵蛇壩北岸有道士觀獨石成山下多圓孔紫雲宮據其巔甚陡峻十里木子場十五里子雲亭相傳揚雄嘗寓此曹能始詩已別子雲宅欣然聞舊城五里石板溪二十里魚叉子灘甚惡又十里犍爲縣南有犍爲山因名又有沈犀山後周於此置沈犀郡北倚大江對岸石尤嶽寄三十里么姑沱三十里樂坡有水曰箭板河自南來注之蓋卽沐源川唐咸通中南詔蠻奄至沐源川陷犍爲卽

此一名沐溪口

二十六日二十五里磨子場十五里泥溪交宜賓界三十里乾柏樹三十里斑鳩石六十里猪毛沱岸石綿亘如城五里高家場三十里牛屎壩五里紅崖寺石壁爛若朝霞一名赤崖古鹽漑灘也華陽志熨道有兵欄神作大灘李冰燒之故崖有五色魚從楚來至此而止畏崖映水也五里雷撇石十里流杯池黃山谷遺跡十里泊叙州府宜賓縣古熨道漢置犍爲郡治唐宋曰戎州政和中改今名取西戎卽叙之義負山枕江滇黔要路秦惠王破滇池通五尺道漢遣唐

蒙發卒治道自熨抵牂牁隋史萬歲征南蠻經馬湖番山而進宋末蒙古將紐璘侵蜀渡馬湖皆由此外水之衿帶也東岸有登高山宋時嘗移治其上又有七星山曹能始詩人行五尺道郡對七星山又寰宇記云郡有大黎山小黎山四時霖雨不止俗呼大漏天小漏天也馬湖江自屏山縣界流入郡境西南納石門小江及龍馬溪水至城東合江門與岷江會按馬湖江卽禹貢梁州之黑水其上游大水有三曰打冲河曰瀘水曰金沙江也打冲河蠻名黑惠江又名納彝江又曰鴉龍江其水洶湧衝擊故以打冲爲名

明初討月魯帖木兒破之於打冲是也源出西番界在黃河源之山南地名查楮必拉蒙古謂之七察兒哈拉平地湧泉數十如鬚沸散若列星滙而南左右支河十二道注之至瞻對入四川界南流東折繞鹽源縣東北又南至烏喇猓猓即今雲南大姚縣之左却鄉而與金沙江會瀘水源出漢沈黎郡之西都境旄牛徼外西番境謂之可跋海周七十餘里東流至越雋廳舊建昌司之南十里其地有瀘山瀘沽古烏蠻所居唐貞元中韋皋招南蠻斷瀘水橋攻吐蕃即此又南流至會理州東接雲南之武定州境與金沙

江會金沙江源出西藏衛地之巴薩通拉木山為岡底斯東麓岡底斯崑崙祖山也其東麓即古犁石山水曰犁牛河番名木魯烏蘇河收納烏藍木倫阿克達木畢拉枯枯烏蘇等河凡數十水曲折四千餘里至塔城關入雲南麗江府境曰麗水又名金沙江以水產金沙也東南逕姚安境與打冲河合又東歷武定境會瀘水於是金沙亦兼瀘水之稱又稱馬湖江水經注越雋郡馬湖江有瀘津即武侯南征道也李京云從越雋至滇道經金沙江通鑑注自雋州西南行八百里渡瀘是也又東流逕昭通府至敘永廳入

四川界卽馬湖府舊治又北至宜賓入江也計金沙發源在黃河源之西千五百餘里在岷江源之西二千八百餘里凡行六千七百餘里與岷江會實川滇黔中間第一大水而禹貢不載水道提綱以此爲大江真源酈注謂馬湖古若水也按山海經黑水之間若水出焉盧者黑色加水爲瀘而金沙稱麗麗同驪亦黑也源出犁石犁亦黑也曰烏蘇番語亦黑也然則瀘與金沙皆古黑水打冲界其間則若水也三水旣會皆可稱瀘皆可稱馬湖又有繩孫淹鮮諸稱實皆黑水耳源遠流長故禹貢舉以界梁州之南境也

至黑水之說不一酈道元孔穎達杜佑皆言在張掖南至燉煌過三危山南流入於南海不知中國之山皆祖岡底斯一支由于闐羌南起巴顏哈喇至積石以逮西嶺而爲終南此中幹也一支由諾莫渾烏巴什起卓爾長山至塏城關以逮雲嶺而入黔粵此南幹也河在中幹之北海在南幹之南江在兩幹之中黑水果經燉煌當積石東北縱能絕河而南亦斷不能越中幹以絕江況能越南幹以入海哉竊謂禹貢言黑水有三一雍一梁一至三危入于南海本非一處亦猶雍有沮水兗又有沮水梁有蒙山徐亦有蒙

山不必強合爲一也梁州之黑水自在馬湖所收黑  
惠麗瀘諸大水皆因黑取義且與華陽南北相對地  
界截然至雍州之黑水本在張掖境經黑山下西入  
青海正雍州西界也其入南海之黑水樊綽蠻書以  
爲有四曰西珥曰區江曰瀾諾其一麗水卽禹貢黑  
水夫麗卽金沙何嘗入南海樊蓋悞以瀾滄爲麗水  
下游也按瀾滄卽瀾諾出自藏衛李元陽以爲卽黑  
水然亦於三危無涉程大昌又以滇珥爲黑水謂與  
葉榆澤相貫且地近宕昌本三苗種裔與三苗之叙  
於三危相應此說較善然滇珥池潯弗流不入南海

愚意應以唐蒙所見牂柯江當之牂柯出烏撒一名  
盤江在南幹山脊之南面其水繚繞於雲貴之境以  
達廣西爲左江至潯州北會黎平都勻定番之水爲  
右江逕梧州會灘江至番禺入南海此水在嶺南最  
大盤迴四省長四千餘里正入南海粵人謂之黔水  
以其出自黔中也黔之爲名自係因黑取義且苗疆  
也禹貢或因三危之遷而名其舊地耳聊備一說以  
俟博雅者正之

又按水經江過江陽雒水從三危山  
東南注之是三危不止燉煌一處也

二十七日晨發宜賓縣十里國公沱十里南廣路通滇  
黔有市集南廣水發源呂部蠻部經豕峩夷界歷慶

符縣東北而來班固所言符黑水出南廣北至夔道入江者也杜佑通典遂以此當禹貢黑水謂其經三危過南溪入南海殊悞甚江水又東歷啞啞磯渴睡壩凡四十里至李莊入南溪界過九捧子灘三十五里石筍沱灘石如筍長數丈因名又東過活水灘鷺鷥磧凡二十五里至南溪縣後漢延熙中嘗於此置南廣郡以常竺爲太守晉屬朱提唐初爲戎州治貞觀中始徙治夔道也三里九龍灘石磧如龍凡九又七里銅鼓子十里孝女磧十里木頭浩蜀人謂港爲浩也入江安界其北岸則富順縣地五里羅鍋礪五

里磨盤灘十里香爐灘十里江安縣隸瀘州西北枕江涓溪水自長寧縣來注之懸岸間研洞深丈餘一石人橫卧其內有亭翼之土人云乾隆庚寅年石崩始出

二十八日過黃葛磧撈坑子麻衣沱風波磧二龍口大碑寺千窩灘凡六十里至大角石又過金匾擔癩石子凡二十里至清溪太白詩夜發清溪向三峽是也又過野猪崖井口大渡口凡二十里至納溪縣本宋時塞堡紹定中始置縣小城倚層阜名曰樓子山納溪水從城西入江卽永寧河源出牂牁生獠界逕江



門峽大洲而北貴州鉛船所經也江岸產錦石有若  
芭蕉者竹葉竹節者龜者魚者蟹橫其螯蟆張其頤  
者又有若星月若老人美女者紋理隱約間以紅白  
以水浸之宛然二里掇旗石相傳武侯樹旗於此以  
誓蠻人八里鋸梁子又過石埠三堆子九節礪魚珠  
磧南田三壩凡三十里泊瀘州春秋時巴地也漢爲  
江陽郡治梁改瀘州唐置總管府督十四州宋志瀘  
州領羈縻十八州置分巴蜀人雜漢夷環江帶山控  
制邊境最爲要地江水逕城南至東門外與中水合  
中水卽湔沱綿維之水流經資中行一千八百九十

里至此入江有望海樓夏月波瀾浩瀚擬諸蓬萊之  
閣吳楚峩舸大舩方行而來滇黔銅鉛均至此換船  
蓋大江自嘉定而上崖高流疾牽挽維艱嘉定而下  
灘磧交錯江流濶狹不常瀘州以東灘險雖多而水  
深岸濶大舟可通故市廛亦盛矣

二十九日舟發過歸子山巨石方廣屹江岸一名撫琴  
臺相傳郡人尹伯奇爲後母所譖於此作履霜操投  
江而死其父吉甫覺之乃援琴作子安之操因名其  
山曰歸子也按尹氏爲周世卿不應在此然揚雄琴  
清英附子安操於江陽華陽國志水經注所載畧同

則此語流傳久矣稍東江西沱有呂仙崖二十里籬  
口二十里鎖口二十里陡坎子三十里彌陀岩三十  
里舊瀘州宋淳祐中余玠遷瀘州治神臂崖卽此語  
云天生重慶鐵打瀘州皆言其險也自江西沱以下  
過梁山石馬鬃磧棺木岩高壩磧巴崖子龍角灘新  
磯子螃蠏磧天生橋皆灘險處也自舊瀘州以下又  
過甕灘磧魚肚磧折桅子田牛尾凡六十里至牛老  
驛入合江界又過猴子石石鼻子焦石子茶溪亭凡  
三十里泊合江縣漢符縣地城倚安樂山如屏風然  
西臨大江縹部水自貴州仁懷縣至縣境有水曰之

溪流入之又北逕城東北隅入江一名小江酈道元  
謂唐蒙出符關卽此按蒙出笮關非符也榕山在其  
南縣署後望暉樓可仰見之蜀江左右山多獬獬此  
山特秀聳峭立有奇氣一名少岷山按岷山在灌縣  
之西有峯三十六前十八爲陽號曰青城後十八爲  
陰號曰大面道書謂爲神仙都會與峩岷山均非輅  
車所經無由登眺余先夕在瀘州夢游峩岷山今夕在  
此復覩岷山之副名山風景以神遇不必以形遇矣  
十月初一日過明堆子三十里王家場三十里陽石盤  
入江津界十里史壩沱卽十八沱二十里洙溶溪卽

車對河永川縣水自北來注之三十里朱家沱自入  
史壩所過門關灘雞婆磧糲米灘倒流灘猴子石黃  
石灑石馬口壺瓶口罐子口皆險灘也又六十里過  
羊角灘羊屎壩松漑狗愁子大磯腦羊狗磧紅滑磧  
黃魚沱凡六十里至石門有市在北岸與巴縣接界  
又過羅筐子澄清岩凡二十里宿白沙是日所過多  
大石往往寬廣百餘丈頑梗江心此時水落尙不甚  
爲害

初二日過母猪磧金柱子狗巴崖石羊磧龍七子凡四  
十里過油溪口二十里龍門灘山頂叢巒如城往往  
若人物攢集其上又過雙漩子雞鴨礪魚子沱凡四  
十里至江津縣漢江州地隋改江津原治夔溪口宋  
徙馬驥鎮卽今治也江水繚繞縣門如几字形故稱  
几江晡過雞翅膀蜂窩子石牛欄青草碛凡三十里  
泊江口水出仁懷經南川綦江而來卽夔溪也一名  
夜郎溪明神宗時楊應龍作亂乘此水以犯江津其  
上源有東溪葛溪丹溪卽播州夷界也

初三日晨過九龍灘黃牽灘甕巴磧青石尾又過蓮蓬  
三灘虎跳子紅崖磧雞心石猪蹄子凡三十里至銅  
罐駟入貓兒峽巉崖峻起皴險入畫畧似五丁金牛

諸石峽內有觀音崖斑竹沱長尾石綿亘遠珞黃市  
巴中記謂之東窮峽也危峯瞰江上有金界寺江心  
單椒矗立名曰龜亭子凡四十里入巴縣地又過陽  
橋灘古墳堆土闌嘴釣魚嘴凡二十里至魚洞溪又  
過水銀口竹節子竈門子斗七子凡四十里舉首恰  
見佛圖關控扼山梁之上又二十里過珊瑚壩鷓鴣  
石泊巴縣城東南朝天門外卽重慶府治古巴子國  
秦置巴郡漢曰江州梁曰楚州隋唐曰渝州宋改恭  
州淳熙中升爲重慶府地據山水之會右嘉陵而左  
大江居高臨深險阨天成市廛鱗比萬瓦雲連川東

一大都會也城周圍二十里因巖岸爲岬峴三面陡  
絕惟西南山脊一綫可通佛圖關昔李嚴欲鑿佛圖  
使城在孤洲上孔明以恐斷地脈止之然明玉珍據  
此僭號大夏湯和等甫入銅鑼峽而其子明昇送欵  
奢崇明據此塹濠連營秦良玉疾趨南平關而賊將  
樊龍授首險不足恃洵然范觀察逢恩羅總戎聲皋  
俞太守恒潤及丞令諸君來迂入城報之陟歷街街  
崎嶇上下無一里平者始知吳船錄所言恭州在一  
大磐石上良非虛語而漁洋謂渝城孤峙江中宛如  
龜之曳尾亦可謂善狀但西南五福宮一帶石稜斜

起半插雲霄正似龜之翹尾非曳尾耳  
初四日俞太守邀余渡江游塗山訪禹迹因雨未果午  
刻范觀察設劇招飲川東道署同城各官咸集署後  
層崖翠律如屏迤抱左右坐次正對塗山絕頂有鐵  
椀一屹然雲表明大將劉綖所立湘潭張九鑑分巡  
川東時建亭其上名曰鑑遠稍右有真武廟霏微中  
望之依稀可辨按酈道元言山上有禹廟塗后祠倦  
游錄謂禹廟後殿一瓊裘像侍衛皆夷人云是禹婦  
翁詢之坐中咸云久廢祇山麓龍門浩有小祠曰禹  
王宮乃楚人公所也按大戴記吳越春秋皆言禹娶

塗山氏曰女媯

世本作女媯

劉向列女傳言禹之治水而

南也塗山氏賦猗南之候其後周之二南實取風焉  
及生啟禹弗子塗山氏能教訓而使之化立庶子之  
官以翼之是以史臣叙三代后妃之助曰夏之興也  
以塗山先儒謂塗山有三一壽春塗山在今懷遠縣  
乃禹會諸侯處東坡詩注淮南人謂禹以六月六日  
生數萬人會山上是也一會稽塗山爲禹致羣神之  
地或崩葬之所一巴郡塗山卽禹后家也昔昌意降  
居若水娶蜀山氏女樞生顓頊於若水之野是爲禹  
祖然則禹蓋屢世蜀人且娶於蜀不祇廣柔稱桑梓

也塗山之祀奚可廢坐客聞之咸以爲然晚登舟雨猶未息

初五日雨甚午刻移舟泊江北廳卽朝天門對岸大江與嘉陵江合流之水口也大要蜀中之水以大江爲經而羣水緯之大江自岷山經川西至川東禹貢南條之首也其在川南者則大渡河馬湖江爲最大卽禹貢之蔡蒙和夷也其在川北者則嘉陵江爲最大卽禹貢之潛也四川之目當指此四水言之亦有舉資水而無大渡河者不知資水較小雖有中水之稱祇係大江之別流不足自名一川不如大渡河之源

遠流長也嘉陵江一名西漢水皆漢以後所改稱禹貢但謂之潛梁州貢道由此水溯今廣元逾寧羌州浮沔溯褒以出斜口故曰浮于潛逾于沔入于渭亂于河彼時帝都在冀若不由潛便須浮海否則由荆州溯漢仍須逾河其道轉迂遠不如浮潛之便捷也古今陵谷變遷褒沔近山多開墾沙石所壅寢失故道自禹至漢不過二千年而武帝時議者已不知褒斜之可漕況後世乎江北廳本巴縣地乾隆年間始設理民廳移重慶同知駐焉五方雜處繁劇亞於巴初六日自江北廳解維過五桂石彈子石十里至觀音

碕南岸有大石佛面飾以金光彩奪目僞夏都察院  
鄒輿所鑿也二十里銅鑼峽其南則石鼓峽懸崖上  
有鑼鼓形故名或曰水聲似之三十里至野驃子灘  
連過烏龜石餓鬼堆鮮人坑馬嶺子皆險灘也凡三  
十里至明月峽又三十里過鉅梁灘白鶴灘至木洞  
有巡檢司大路可通南川沿江粗石如困如廩如獸  
如鬼綿亘不絕又過紅沙磧橫梁子百丈梁雞公嘴  
凡三十里至羅磧又三十里至扇背沱入長壽界遙  
望東北岸石巘瞰江其上有石砦戊午己未年間居  
人於此避白蓮教匪又過石門養蠶擡盤子諸灘凡

三十里泊長壽縣治踞山顛廬居山腹溪流烟樹城  
市儼山林也西北有舊城鑿石爲門中有田畝蜀山  
多危聳長壽山獨平行曲折或云似壽字而長故縣  
以名焉

初七日舟發過龍舌灘回望城山頗如飛鳳治後石骨  
削立天然險固又過張公灘有張桓侯廟灘石刻桓  
侯不語灘五字相傳舟過偶嘈戲則灘水怒沸故榜  
人戒焉凡三十里入涪州境過黃草峽卽水經注之  
黃葛峽也又過黃魚橫梁馬絆諸灘皆險絕水聲轟  
然凡三十里至蘭市宋開慶中蒙古將紐璘造浮橋

於蘭市以杜援兵是也北岸有二山方其頂而峻其郭背有石峽圍繞如圈几形致匪滋事時居民結寨其上遂成村落昔酈道元謂黃葛峽山高險絕無人居今此居民却以宅險而安又過磨盤麻堆諸灘凡三十里至李渡相傳李白渡此曹能始詩涪陵李渡最繁華不借詞人枉自誇又過龜龍峽妃子園唐時於此置荔枝驛七日而至長安香味猶生按荔枝諸書多言南海惟蔡君謨荔枝譜言涪州東坡亦言天寶歲貢取之涪十五里過火烽灘南岸有白馬石崇巖聳峭其上有廟卽古雞鳴峽也又十五里過龍王

涪泊涪州古巴郡地巴先王墓在焉蜀漢置涪陵郡龐統之子肱嘗爲郡守或云漢涪陵郡在今彭水縣今涪漢枳縣也史記蘇代曰楚得枳而國亡卽此涪江自貴州大定境逕貴陽遵義平越石阡思南各府境至酉陽州之龔灘而湖北來鳳利川咸豐之水入之至彭水縣之江口而正安州水入之北流至武隆司入州境繞城東門外入於大江此水上源曰烏江乃貴州省北第一大水源流長二千三百里土人謂之黔江秦司馬錯由此水以取楚黔中蓋三省咽喉要害也有小重慶之目州治在南岸磧石上恰對北



巖鈎深堂爲伊川先生注易處

初八日舟發過雙魚石漁洋詩涪州水落見雙魚是也  
此石魚在江底一銜芝草一銜蓮花各三十六鱗現  
則年豐十五里羣猪灘江心亂石如猪稍下五里一  
石突立如屏風名曰峭崖水漲時甚險上下維舟以  
俟諺云羣猪陡崖無事莫來如必要來烟漲雲霾言  
宜乘烟雨中過也三十里百牽灘三十里焦崖水經  
注所謂東望峽也二十里利市鎮入酆都界十里南  
沱北碛三十里過觀音梁大佛面送客堆殘悲梁均  
極險惡過酆都縣古巴子別都也漢置平都縣隋改

豐都因縣有豐水平都山得名明初改豐爲酆小說  
家遂有鬼山陰洞之說語皆荒誕然水經注平都有  
天師治兼建佛寺甚清靈寰宇記亦謂陰長生王方  
平得道於此則知鬼語附會有自來矣縣境山多險  
陋獨平都山在治東北二里許蒼翠可愛道書第四  
十二福地也山上有景德宮卽仙都觀唐時有段丞  
相修觀記段少監修齋記天尊石像記老君石像記  
感應碑張大理詩杜光庭石函記李吉甫真人影堂  
記二真君碑二仙公碑皆稱名蹟詢之縣令瞿頡云  
已無存又有平都書院王陽明作記亦頽廢晡行三

十里過葫蘆溪泊高家鎮

初九日五里鑾珠背十里虎鬚子五里鳳凰子皆險灘  
十里羊渡溪隸石砭廳廳地與酆都犬牙相錯縣治  
照壁前有土一隅云卽石砭所屬也十里魚洞子入  
忠州界十五里白馬子南岸曰烏楊鎮北岸曰將軍  
溪有嚴將軍墓因名四十里忠州漢臨江縣地屬巴  
郡後屬巴東郡唐貞觀中詔改忠州稱其地邊巴徼  
人懷忠信蓋指巴臣蔓子及郡守嚴顏而言也宋度  
宗潛邸於此及卽位升爲咸淳府明仍爲州洪武中  
調長沙衛官兵修城周四里有奇螿以磚石頗堅忠

爲三峽名州而多遷謫有四賢堂祀劉晏陸贄李吉  
甫白居易四人宣公初厝於此有祠在南岸翠屏山  
樂天刺州時爲東樓以宴賓佐西樓以瞰鳴玉溪張  
樂巴子臺以會竹枝歌女又於東坡種花東澗種柳  
蘇長公慕其流風遂以東坡自號所謂忠黃江上兩  
東坡也自忠州東下五十里有黃華洲一曰皇華城  
在大江中周遭十餘里四面懸絕漢臨江縣治也水  
經言江水又東得黃華水口左逕石城南卽此李雄  
之亂巴西郡亦寄理於此今殘堞猶隱隱可辨居民  
無雜姓惟陶氏一族居之自云明千戶陶章之後出

自吾邑蓋卽洪武中調兵築城之遺吾族自長沙桓公以來在安化者至明初慶源公下又分爲奇良端三房子孫遷居渝瀘潼閬北逮興漢不下數百戶此其尤先者歟人易世疎爲之慨然十里過折桅子巖脚如敗甕舟行避之反漩入不得脫而尾折歲壞船無數乾隆年間州牧甘隆濱沉鐵鐘十二以鎮水崇復操舟往復上下數日始得放舟之法遂於灘上立石大書深刻對我來三字行者賴之俗云武侯所立誤矣十五里曹溪盤有水從梁山縣蟠龍山來經涂井南入于江卽水經注鹽井溪也岸石連亘不絕北

岸有石竇寨尤奇古名四方山從遠望如困廩近望則方而扁高十餘丈四面陡絕左旁爲樓十層梯而上乃達巖之南角其頂平坦有寺觀竹木甚翳泉出其上四時不竭折桅子米艘有壞者往往米從泉眼湧出知其下與江通矣教匪滋事時難民走避其上獲免者千餘人五里西界沱石砦廳通衢也設巡檢一員石砦在明爲女土官秦良玉地今馬氏世襲土通判卽其後裔五里入萬縣界過石鼓峽凡三十里泊武陵集

初十日雨而風

十一日曉過雙魚子磨刀灘三十里至冉渡二十里大湖灘水經注謂之和灘宋嘉熙中蒙古渡湖灘施夔震動卽此北岸山如長城銳其尾以入江修亘十餘里有曰蓮花碛者玲瓏透剔巧若鬼工在諸頑石中特出面目奇觀也江流至此爲鉅石所扼激而成湍鄜注謂江水東逕石龍有盤石基亘通渚是也凡六十里至蛾眉磧其間迴崖複壁摩天插江猗若龍象不可方物南岸有匾擔寨者恍惚日前所見之石寶寨也蛾眉磧下有岑公洞深廣數十丈石巖盤結如華蓋有泉出焉唐時岑道願隱處北岸卽萬縣漢羊

渠地建興中置南浦縣沈約謂益州牧閻宇表諫羊渠立縣是也縣治背負都厯山剡施突岫又北爲獅子山形如狻猊惟鼻尖可登其下有苧溪折流十二灣至城西里許入江有巨石橫亘溪上謂之天生橋又西四里有天生城四面峭立如牆惟西北一線可上徑寬尺許俗呼天子城言漢昭烈帝嘗駐兵其上也又西十餘里有萬戶城一名人存山險峻亦如天城明末土寇譚宏譚詣譚文盤踞忠夔恃此爲巢穴入我朝納款爲侯自相魚肉旋俱撲滅可爲負險者戒苧溪之上又有太白巖一名絕塵龕相傳太白

讀書於此有大醉西巖一局碁之句本集不載黃魯  
直謂西崖之勝東望巫峽西盡郁駟不敢與之爭又  
王侶謂峽中之觀惟岑公洞及魯池不因江以爲勝  
魯池亦在太白巖側也小泊縣前不及遊觀然山川  
奇險已一一在目矣未刻復解維十里過高桅子至  
赤沙磧北岸圓峯聳天亦古寨也三十里猴子石太  
陽磧八巴陽峽亂石林立長千百丈細視皆修整有  
層次如城脚然水面忽窄若可葦杭語曰淺莫過羅  
磧在重慶下深莫過巴峽昔有人以絲四兩繫石探江底  
不能到蓋水爲石束易廣爲深矣又過九堆子白鶴

灘凡二十里泊小江口卽開縣水也其上源有三一  
出梁山縣之高梁山經渠口至開水經謂之北集渠  
卽墊江也一出新寧之霧山坎經雲陽至開注謂之  
彭溪也一出大寧之萬頃池經綏定至開注謂之清  
水也開縣產米三水旣會舟航四達矣是日所過多  
巖險陸路由萬縣道梁山大竹渠縣蓬州南充蓬溪  
射洪三臺中江金堂至成都一千三百里半月可到  
十二日發小江入雲陽境過上崖寺下崖寺巖厂嵌空  
上結佛龕以鐵鍊縋而上一名燕子巖宋喻汝鏞雲  
安下崖次涪翁韻云徑向山腰轉門從水面開片雲

巖下宿一鉢朔方來風景可以想見又過馬嶺子灘  
凡六十里至雲陽縣漢胸臆縣地故城在縣西四十  
里胸臆音蠢閏卽蚯蚓也瘴濕所生此地多有因名  
後周改爲雲安縣有雲安鹽場在縣西北三十里馬  
嶺山下與三牛山相對漢扶嘉言三牛對馬嶺不出  
貴人出鹽井自漢唐至宋明皆置鹽官以司之今猶  
有大使一員然蜀中鹽井甚多如嘉定犍爲富順射  
洪皆產鹽甚旺雲陽之利今稍衰矣其味差苦不如  
射洪犍爲之佳豈古今地氣有殊歟縣治在崖坡上  
偏仄甚午刻開舟五里過寶子塔江心鑿石作塔以

爲舟標南岸有新軍河自施南府來注之又十里東  
洋子又十五里廟磯子又十五里磁莊子此三灘極  
險惡有張桓侯廟甚靈舟人虔祀之遂寧張相國鵬  
翻刻詩廟中云神明豈愛行人祭欲挽江河爲漢留  
是日過東洋子邑令具轎請余登陸余却之曰一灘  
尙畏焉能泛海上槎乎危坐作書不輟蓋藉以鎮舟  
人之心耳然浪花洶湧篷窗盡濕矣又十五里泊三  
塊石

十三日自三塊石過烏龍沱南陽峽合水子南岸有水  
曰烏龍也凡四十里至白巖有水曰頭塘溪又二十

里過青崖子老馬灘泊夔州府奉節縣南門外春秋時魚人所居庸屬邑也秦置魚復縣漢末改巴東郡唐爲夔州地據關險黔楚之咽喉兩川之鎖鑰也鄧太守熿邀往遊白帝瞿塘諸蹟午刻入城報謁遂同出東郭渡大瀼水一名西瀼水蜀人謂山澗之通江者爲瀼也水出萬頃池其下卽八陣圖遺址亂石在沙渚上相傳晴霽久有雲氣出其間則兩夔人歲以人日傾城出游謂之踏磧云二里過卧龍山拜杜工部草堂其左爲武侯祠度石橋循山而東八里至下關城一名子陽城卽古夔城也殘堞宛然繚繞山顛

西峻東迤其山脈稍南出突起圓峯如以線繫匏卽白帝城也兩城之間謂之馬嶺從小石門內穿菜畦緣以上始知子美城尖徑仄旌旆愁之句確是白帝情形也山周圍僅可里許上有明良殿祀先主以武侯關張配碑刻殊少佳者惟沔陽陳文燭一詩差可又宋時有三峽堂卽鎖江亭遺址亦久廢矣東瀼水繞其左麓公孫述嘗引以墾田謂之東屯又東爲赤甲山其高插天一角銳起尤奇白鹽山在江之南水經注謂白鹽崖高于餘丈殆不止此大江包山之右麓而東灩澦堆屹立其中其形如獸回首西望蓋全

蜀山川於此關欄崖屨四崩千態萬狀一夫當關萬  
衆踈阻壯矣哉臨眺久之出小城繞山腹而下至觀  
音洞一石佛卧龕內俯視瞿塘水色黝然昔杜宇時  
有龍戰於此山大崩裂水溢橫流其相斃靈鑿之杜  
宇謂其功大讓以國而歸隱西山其後國人思之聞  
鶻聲呼望帝也伐山開峽語近渺茫然縱觀石上斧  
鑿痕儼然上世神人固當有之世人狂於目前隘矣  
觀音洞前有仙人掌尤可玩歸途望夔城鱗屋森然  
在蓮花山下一塔隱隱矗雲端太守設劇飲府署署  
後有望華亭登之城內外一覽可盡勞有甘夫人墓

以土垣衛之古槐數株蒼翠尙茂酒闌登舟金雞已  
唱曉矣

十四日巳刻自奉節開舟過魚復浦土人謂之碁壩卽  
八陣圖也昨日望之殊無所見奴子有與長年往游  
者云圓石八堆四橫四縱周圍可六丈許高僅三尺  
許猶可辨識惜不及往視矣南岸有魚復城故址每  
歲魴魚上至浦前則迴首順流而下故夔以西無魴  
也魚復之名因此十里至滄豫堆孤石蹲踞高二三  
十丈或言其形似夔故地以名焉然夔本一足茲石  
恍忽四足近有撈銅者沒水至其下云石底嵌空實



三足也一說蜀山有大牛名犍重千觔此石似之故以夔名晉太興中此牛嘗出上庸郡人用弩射獲識者謂卽爾雅所稱魏也古詩滛瀨大如象瞿塘不可上滛瀨大如馬瞿塘不可下蓋水大則石沒其小如馬舟來觸之阻擱不得脫故曰不可下水小則石出其大如象彼時節節皆灘故曰不可上也一作灩澦大如鼈瞿塘行舟絕灩澦大如龜瞿塘不可窺殊無義味滛瀨一作允豫又作猶豫言水脈難決舟人疑惑弗敢前也大要舟行至此必作之字繞以避之來時直對此石及將近乃轉而南又折而東尺寸間成

毀立判矣北岸卽白帝城公孫述據蜀有白龍自井出遂自稱白帝移魚復城於此改號白帝城也過東灩水逕黃龍灘一名鐵柱溪北岸如鑿鋸南岸如劈削卽峽門也萬仞矗天奇嶮可怖古稱江關又曰扞關一曰鐵鎖關也五里男女孔灘五里石板峽懸崖間有一小匣又有石洞置竹箕數事舟人云其中產硝磺土人從山頂縋而下百餘丈出入以爲恒猿狖蟲蟻所不能至而覓利者至之可歎也五里黑石灘入巫山界石質如生鐵鑄成滲痕宛然夏漲時最險諺云灩澦冒頂黑石下井言其危也十里戴溪有小

市南通湖北之利川夔峽至此而盡戴溪蓋酈注烏  
飛水也北岸有石曰惡鬼堆五里虎鬚子灘南岸巨  
石側立如梳齒又曰門扇峽五里九墩子小青灘十  
五里龍寶子五里焦灘十五里三纜子五里東竿嘴  
五里蝦蟆灘十里紅石梁五里泊巫山縣縣枕山臨  
水形如圓几故夔子國熊摯所徙也吳置建平郡六  
代因之故城在稍東山上水經注城緣山爲墉三面  
傍谷南臨大江是也隋始移縣於今治古陽臺在北  
門最高處其後有崖謂之藏春塢下臨小溪國策蔡  
靈侯飲茹溪之流卽此高唐觀在城西正對南陵山

路通施南旋繞而上謂之一百八盤或云山形如巫  
字望之亦不甚肖按巫山以巫咸得名郭璞賦謂咸  
以鴻術爲帝堯醫師生爲上公沒爲貴神封於斯山  
因以名之又按山海經大荒有靈山巫咸巫昉巫卽  
巫盼巫彭巫姑巫真巫禮巫謝巫羅十巫從此升降  
百藥爰在然則巫之爲神久矣與商臣巫咸別自一  
人也大寧河水流經城東入于江其上游卽馬連溪  
又曰昌江源出陝西之平利以次會竹山房縣之水  
逕大寧至此水經謂之巫溪也溪上有楚王細腰宮  
址溪東山峯峻起曰筵篔山神女廟在其顛絕巘瞰

江奇峭特出自紅石梁卽望見之擬往游會日暮不  
果晚來月色盈舟推窗望陽臺高唐諸山秀倩可惋  
制軍差官送出境將以翌日自崖而返秉燭作書報  
之

十五日辰刻發篁篨山下五里空亡沱入巫峽山崖峭  
起奇皴萬狀十五里跳石唐雷萬春生於此五里上  
座牛黑石林立如夔峽所見兩岸合沓惟見青天一  
髮山頂如城如閣如困如花如火如華表如人物鳥  
獸爭奇獻詭目不暇給五里老鼠錯五里黃草坡北  
岸山頂石如方城西南向有門有闕長年呼爲獅子

掛銀牌名雖俚亦可想其奇幻也五里霸王愁南片  
欹石蹲水千仞陡立其紋如波濤涌湧舟人以金盃  
金甲名之五里蒲泊子北岸山崖萬仞頂有兩崖尖  
銳甚層巖之上似有空坪一洞天也山脚如重磚斜  
迤石路斷絕緯纜者鑿山爲磴繫鐵索以引手問其  
名無知者蓋其地名鬼錯愁舟子諱言之其頂一石  
如太湖石次如困次如廩舟人呼爲大磨小磨又下  
一石獨立千仞謂之尖刀鋒亘古無人能上也數里  
內南岸稍圓平有土北岸無寸土草木所不能生猿  
狖所不能緣也稍下兩壁削立如圓鏡面上刻大字

但見重巒疊嶂及一峽字中間數字不能辨兩山頂  
凹凸微露團山亦隱秀一瞥眼失之矣五里杉木灤  
南有小峽重崖迴護其中呀然疑武陵桃源不遠人  
世蓋入蜀記所稱清水洞也北峯山頂石槽直下如  
火磚色稍下有一洞此來山半多洞跳石北山頂一  
洞尤奇望之似可見天杉木灤下石壁皆峻有一石  
高起如雞卵日色至此高擱崖顛冷風料峭直欲添  
繇矣往聞人談蜀道上山脫衣下山加裘言山高則  
陰晴頓異峽中亦復似之五里美人峯又名朝雲峯  
卽神女峯也巫山十二峯皆在北岸美人峯尤纖麗

入蜀記云八月十五夜月明時有絲竹之音往來峯  
頂猿狖齊鳴達旦乃止蓋神靈所栖止也古神女廟  
本在此處范成大吳船錄云戊午乘水退下巫峽至  
神女廟陸放翁入蜀記亦云二十三日自疲石過巫  
山疑真觀謁妙用真人祠卽世所稱巫山神女泊清  
水洞二十四日抵巫山縣云云是神女廟之設初不  
在篋山明甚王漁洋亦言遇父老二人稱廟址在  
飛鳳峯有古碑以波濤洶怒不可繫舟前代始移篋  
篋山云巫山神女爲西王母第二十三女雲華夫人  
助大禹治水見于宋陶穀所爲廟記其文瑰麗又有

紹興十七年馬永卿記云少讀高唐三賦思有以關之比考禹穴紀異及集仙錄載禹導江至瞿塘實爲上古鬼神龍蟒之宅護惜巢穴作爲妖怪風沙晝暝迷失道路禹乃望空而歎俄見神人狀類天女授禹太上先天呼召萬靈玉篆之書且使其臣狂章虞餘黃魔大翳庚辰童律爲禹之助禹於是能呼吸風雷役使鬼神開山疏水無不如志禹詢於童律對曰西王母之女也館治巫山禹至山下躬往謁謝親見神人倏忽之間變化不測或爲卿雲或爲霏雨或爲游龍或爲翔鶴旣化爲石又化爲人千狀萬態不可殫

述禹疑問童律對曰上聖凝氣爲真與道合體非寓胎稟化之形乃西華少陰之氣也僕始讀其書而駭異旣而深思之所謂西王母者有合於坤爲母兌爲少女之義陰陽不測變化萬物豈不灼灼明甚宋玉此賦雖載文選然王逸哀類楚詞甚詳獨無此二賦足知其贗蓋兩晉後膚淺鯁生戲弄筆研劇聞雲雨之一語妄謂神女行是於陽臺之下不知神女卽雲雨也且懷襄孱主屢爲秦困襄王乃東徙於陳其去巫峽遠甚亦可以爲驗也此文見者頗少因錄之又按東坡詩上帝降瑤姬來處荆巫間神容豈在猛玉

座幽且閒則此論早已有之宋大夫一時寓言可毋庸置辨也峯前馴鳥迎送客舟色如常鳥而差小搏飯鄰之銜接甚捷五里過一山如圓髻而聳近觀若獸昂首南望其右偏有石洞居者架戶其中十里棺柴峽山腰凹入上置一物舟人謂其形如棺細望似鐵鍋其地非人所能至莫窮其怪異也五里培石入蜀記作疲石亂石堆聚江干皆方平如棹子然稍東又有小澗瀕石其色皴黑宛然瞿唐峽口如馬如象之石質也此處卽古新崩灘漢和帝時山崩晉太元二年又崩當崩時水逆流湧起數十丈今洄漩猶悍

五里萬流驛入湖北巴東界卽鱖魚溪發源恩施縣水經江水過巫縣鹽水從東南流注之是也七里過金扁擔灘三十里卓牛灘八里三松子灘又五里過門扇峽泊關渡口卽唐天寶六年賜名蜀口山者也巫峽至此而盡 四川一省欽巖外厥沃壤中蟠貨材所殖杭稻尤蕃地勢居高臨下足以控扼東南屏藩關隴是故秦得之以弱楚晉得之以吞吳蒙古得之以亡宋而成周劉漢之興皆以蜀爲前驅至於乘危竊據亦自偏霸一方而見覲卽消每不勞再伐所謂我往寇往險固不足恃也其山水清奇而露故人

士多秀穎輕俊少堅凝之氣小民懷德畏威易於治而亦易於亂自玉珍僭夏楚兵隨之川東北已多麻城徙獻賊屠剗而後土著幾盡今則楚人半而吳粵之人亦居其半也又按說文蜀者葵蠶之名淮南子蠶與蜀狀相類意者蜀山蝻蝻蠖蠖有似此蟲故以蜀名而號曰蠶叢也至爾雅獨山爲蜀則川境山皆綿亘實無獨起之山一說蜀者祭器見於管子其形外實中空蜀境似之此則後王冶器未可蒙上古蜀山之號也

蜀輶日記卷四

安化陶 澍雲汀

十六日自關渡口東下過西瀼口東瀼口經母猪灘青竹標凡四十里至巴東縣隸宜昌府治巴山麓山海經夏后啟之臣曰血涂司神於巴是也縣南臨水無城有秋風白雲二亭又有相公溪皆寇萊公作令時遺蹟自巴東二十里至牛口入歸州界有小鎮舊設巡司一員今廢東坡夜泊牛口云居民偶相聚三四依古柳負薪出深谷見客喜且售情景宛然在目此詩編蘇集者悞置戎州之前不知嘉叙之間無所謂

牛口也十里上巴斗下巴斗十五里石門酈注石門  
灘北岸有山上合下開緣江步路所由先主爲陸遜  
所追逕此燒鎧斷道陸游謂爲天下之至險也二十  
里葉灘一作拽灘亂石林立有葉枕葉牀之稱水漲  
時極險十五里老虎石五里咤灘水石相激作叱咤  
聲故名江心有石梁九道名曰九龍亦名人鮓甕北  
岸卽歸州治依山卽坂如一彈丸在磐石上城內外  
無分寸士四時但聞灘聲如雷晝夜不絕山谷詩命  
輕人鮓甕頭船洵非虛語州前不可泊灘行十里過  
烏牛石蓮花三漩泊南岸老歸州山頂平濶堞址隱

隱相傳楚王舊城其下爲屈原三沱有三閭大夫祠  
宋玉宅女嬃砧放翁詩江上荒城猿鳥悲隔江便是  
屈原祠入蜀記宋玉宅在秭歸縣東今爲酒家釀矣  
薄暮登岸踏亂石至山頂徘徊久之東望烟靄明滅  
間兩崖對刺天外蓋卽兵書峽也按歸州古夔國后  
夔歸姓封此故又稱歸國也周封熊繹爲楚其後楚  
東徙而封熊摯於此故有夔子城漢曰秭歸三國爲  
吳西偏重鎮

十七日晨聞欸乃聲披衣起已行十里過蒲莊河黃牛  
灘至香溪矣水出興山縣流經昭君村南入于江張



又新煎茶記第十四水也五里過耍和尚至白狗懸  
杜詩白狗黃牛峽卽指此危崖桀竦欲裂壘空間若  
疊瓦片舟人云此武侯所藏兵書五里過新灘有頭  
灘二灘三灘之稱礪礪橫江其聲雷碾喧轟動地范  
成大謂其名豪三峽不虛也水落時尤險語云大水  
怕葉小水怕新按後漢永元二年秭歸山崩又陸游  
記皇祐三年知歸州趙誠以山崩石壅害舟聞於朝  
疏鑿之蓋江絕於天聖中至是始通迨明嘉靖中龍  
起山崩而灘門益狹矣灘上居民百餘家以挑負爲  
業每貨舟上下必起卸搬灘而更載同知一員駐劄

以彈壓焉於時水勢未落崩淇汙汙遂放船而下三  
老長年齊聲奮楫余方倚窗檻觀山色倏覺雪花飛  
起浪大於屋舟擲其中飄如一葉瞥目間已迅瀉十  
數里始悟杜詩身輕一鳥過殊肖此間情景過馬肝  
峽北岸絕壁上有石如肝肺纍纍下垂故名旁有獅  
子巖翠草被之如毛氍氍南岸有小澗從兩崖間流  
出望見其中礪礪兀硯面目無一雷同計自新灘而  
下共行三十里至空舫峽岸屈鈴束江心大石力拒  
洪流名曰雞翅膀下有黃石坂三硃石又有南丈硃  
北丈硃左旋則右觸上撇則下橫冬夏之月必輕舟

卸載始可上下故以空船爲名盛宏之記空船峽甚  
高峻卽宜都建平界也遠望交嶺上有二石如人攘  
袂相對俗傳兩郡督郵爭界於此宜都石小敬議者  
以爲不如也又十里過虎鬚沱牯牛石羊背灘黑崖  
子至屈溪驛入宜都界山勢忽豁推窗遠望齒從蓓  
麗如壺中九華別有洞天西望峽中烟嵐迴合千態  
萬狀又如天台歸客乍出仙源洞口雲封蒼崖零亂  
不待漁舟重問已有天上人間之隔矣自屈溪而下  
凡六十里至黃陵廟其間亂石如麻節節皆灘達洞  
野猫使君鹿角狼尾流頭諸灘皆古險鍋籠子尤險

謂之亂石羅城又有渣波灘南虎北虎大峯三硃等  
險總名爲竹節灘俗呼腰站河至黃陵廟而無義灘  
齒列其下又十里至紅石子而川峽極險之灘始盡  
矣舟子皆喜躍相賀以平安出銀牌犒之黃陵廟祀  
黃魔神牛首人身舊有孔明碑記廟後卽黃牛山北  
首南尾兩角嶄然旁有石宛若人形立牛側人黑而  
牛黃崖壁則灰白色其山礧礧魁碗亘紅石而東數  
十里相屬不絕所謂朝暮見黃牛也二十里南沱三  
漩入扇子峽山高五百仞名曰石鼻山臨江阻險上  
有巨石橫六七十丈如牌筏然一名石簾山周隋間

峽州置治於其上峽口有和尚道士二石對峙江濱皆絕肖五里蝦蟆碛山麓豁開一洞巖踞其中作黃金色泉從頤間噴薄而出水晶謂爲天下第四泉北岸有黃額洞迴湍入之鞞鞞有聲過梢公碛有石如磨纍危峯上又一石纖瘦特立如人挾柁所謂梢公也又過神礪子有洞中立一石似老人持竿而釣計自蟄蟆碛而下連過石牌胡勁偏牢黃毛等灘凡三十里至平善壩言江流至此而馴也俗呼水之渟涵者爲壩云過白龍洞出扇子峽凡十里至南津關卽下牢戍夷陵故城也谿北有三游洞名自元白始而

蘇公父子繼之西陵峽至此而盡四望曠然有舉頭天外之概昔陸放翁自吳入蜀初至下牢卽訝其奇怪不可狀及至夔巫反平平無詫語王阮亭出巫山抵巴東嗤爲賸水殘山不堪著眼蓋人情乍見則驚久而習焉則忘非山水有時顯晦也余今晨自兵書峽望新灘諸山雖高崖修阻不甚奇詫以爲不及夔巫及抵空舸羣峭盆涌如入化城逮黃牛一帶面目又別入蝦蟆碛更出奇觀通計此日所見有方若城者有圓若蓋者有呀若牙者有竦若翼者有仰若缶覆若釜者有簇矗若筍尖者有跗葩駢萼爛若芙蓉

者有單支片段森若戈戟者有牽衣掩袂若仙子御風者有扶筇荷篠若老人負曝者有糺互若蛇螭鏘舞若鸞鳳者蓋沉雄瑰偉稍異夔巫而秀峭似之可以歎觀止矣按三峽之說不一有謂明月廣德東突者庾仲雍記也有謂明月巫山廣溪者峽程記也有謂西峽巴峽巫峽者寰宇記也有謂西陵巫峽歸峽者宋肇記也惟王洙瞿塘巫山黃牛之說爲近是蓋川江之以峽名者甚多難以枚舉所謂三峽者專以在荊州者言之耳盛宏之荊州記云三峽七百里中兩岸連山畧無闕處今自夔府東至宜昌將近六百

里奇險盡在其間蓋自灩澦堆至虎鬚灘統名爲瞿塘峽一名廣溪峽卽夔峽也自空亡沱至門扇峽統名爲巫峽其尾盡於巴東故又曰巴峽也自兵書峽至平善壩統名爲西陵峽其峽起於歸州而翹於黃牛訖於扇子故又曰歸鄉峽黃牛峽扇子峽也諸說紛紛斷以夔峽巫峽西陵峽爲三峽此因親歷其境目擊層巖疊嶂其阻且長者有此三處證以盛宏之荊州記確然無疑自南津關放舟日已暮見江豚拜風有物黝而長出深潭中似蛟虬之屬也十五里泊東湖縣

十八日晨大霧發東湖本夷陵州地乾隆中升爲宜昌府置今縣戰國時爲楚西陵邑頃襄王二十年秦白起拔我西陵明年拔郢燒先王墓夷陵是也秦始置縣吳改爲西陵郡有陸抗故城在江東南酈注所言卽山爲壙四面天險也北周改峽州卽下牢戍也唐徙治步闡壘卽今治也宋建炎中移治石鼻卽蝦蟆碚山也元仍還舊治地當三峽之口爲楚蜀咽喉形勝所必爭歷代皆置重鎮然白起王濬與隋楊素之下陳唐李孝恭之克蕭銑均以建瓴之勢成功若所據非宜則田戎步闡終歸敗亡卽先主之連營七百

亦不免見欺小兒狼狽西走則知乘高因險亦視乎其人也舟行二十里臨江市十里虎牙灘北岸有虎牙山石壁紅而有白文如牙形故名南岸卽荆門山隸宜都縣其山上合下開有石跨兩壁如橋通一門江濱石屹若碑謂之十二碛碛一作背謂與大梁山相背也此地縴纜難施鑿路以通行人舟至此先避虎牙而南復避荆門而北爲大江極險處楚之西塞也又有虎腦碛卽古獠亭四十里宜都縣漢夷道地清江水自貴州思州界逕四川黔彭間流經建始長陽至縣西入江水經謂之夷水相傳廩君乘土船處

又有白巖溪蒼茫溪富金溪源出鶴峯州皆從縣境  
入江連過秭桿馬鬃狼牙三磧凡四十里泊白水港  
入枝江界

十九日二十里過枝江縣隸荊州府楚故都也熊繹初  
封丹陽在歸州其後遷此亦稱丹陽水經注枝江地  
平敞北據大江江汜枝分故名東過石鼓灘至焦崖  
凡三十里山勢逶迤欲盡又二十里至羊角洲而彌  
望皆洲江流至此如枝之析分爲南江北江所謂江  
有沱也以江心爲界北屬枝江南爲松滋地荊州記  
縣左右有數十洲盤布江中百里洲爲最大羊角洲

蓋卽百里洲之首也二十里過松滋縣楚鳩茲邑晉  
咸康中廬江郡之松滋流民避亂至此僑置今縣遂  
因之桓沖鎮荊州移治上明城卽此又五十里泊紅  
口卽百里洲之脊也一作馬口南岸曰采穴口

二十日二十里過閘口枝江地沮漳水從當陽來入江  
直射南岸李家灘過魚兒尾入江陵界十里因風泊  
太平口卽虎渡口也後漢時法雄守南郡有異政虎  
皆渡江因名大江自枝江縣分流經松滋至江陵境  
其南一枝入虎渡口東南流經柳市彌陀市至公安  
縣之黃金口又南逕港關塞口楊家蕩泗水舖入湖

南澧州界至三汊腦而分爲二支一出津市稍東之  
觀音港入澧一出安鄉交界之焦溪入澧皆東注於  
洞庭所謂沱也凡水之出於江而復合者謂之沱梁  
與荆皆有之禹貢導江東別爲沱又東至于澧過九  
江至于東陵今自虎渡至澧南北相距二百餘里說  
者遂以禹貢至澧之文爲不可解王晦叔謂南江在  
古時爲岷江之正流從虎渡口注澧而北江則沱水  
也其後北江漸盛南江漸微反以南爲沱北爲江矣  
此說甚新然細觀山脈從澧州至公安楊家蕩皆有  
岡脊惟三汊河無山是其過脈處及東遠安鄉華容

則重起山巒江本經流非沱可比難於穿岡脈而南  
果穿岡脈而南則當如導岷逾河之文曰逾于澧不  
言至于澧也大抵洪水之時江與澧本自相近中間  
界脈惟有楊家蕩等處一綫之隔今之相距二百餘  
里皆兩岸隄堦爲之耳澧本水名因以名地江行至  
此南岸爲澧境故曰至于澧猶言至於澧州云爾非  
謂會于澧入于澧也由此而東至巴陵之城陵磯而  
洞庭之水出焉故曰過九江也至九江之說不一有  
以彭蠡爲九江者劉歆也王莽緣此改豫章爲九江  
而鄭康成之說因之有以潯陽爲九江者

漢潯陽縣  
在蘄州界

內地名蘭城南接德化境孔安國書傳與班固地理志也孔穎達緣此謂江分九派猶河分爲九而應劭之說如之此皆秦漢時九江非禹貢九江也禹貢言九江者三皆在荊州而彭蠡潯陽在揚州之域劉鄭諸儒皆北人昧於南方地形遂併禹貢原文而昧之孔應之說尤謬江果分九則九江卽江之正身豈得言過耶按山海經洞庭之山帝之二女居之是常游於江淵澧沅之風交瀟湘之浦是在九江之間然則洞庭之稱九江由來久矣又按屈原哀郢云上洞庭而下江又曰當陵陽之焉至今秣南渡之焉如屈原放逐江南將

溯洞庭必先由郢下江道出城陵磯卽東陵也所言陵陽自指東陵之陽猶今巴陵之稱岳陽也由此南渡洞庭而浩淼無際故曰南渡焉如水經注江之右岸有城陵山其上有城蓋後人因城之故而訛東陵爲城陵耳荊州本治江陵而城陵與夷陵分踞東西夷陵爲楚西陵則城陵山之爲東陵無疑矣自川江而東除却洞庭更無九水同匯一處可以總名之曰九江亦更無名山在東岸可以稱東陵者若林三山謂廬江郡有東陵鄉無論小鄉僻地不足爲證且江至東陵東迤北會于滙果在廬江則江漢方朝宗



赴海更從何處迤而北滙耶至會彥和以辰沅漸淑

无

應作無一作澠又作巫作元者非

酉澧資湘爲九江朱子去无澧

而易以瀟烝後人又謂无澧不當去蒸不必入但當  
易漸爲瀟耳蔡傳亦從曾說而三山謬謂曾氏之言  
無所考據不可從不知山海經非僻書而沅湘辰淑  
屢見楚辭資酉漸無注於水經豈得謂之無據若林  
氏可謂盲人道黑白也因論江沱而備及之

二十一日午刻風息始開舟東過龍洲卽百里洲之尾  
也荆州記自枝江縣東極江津其中有九十九洲水  
經注江陵城南有馬牧城此洲始自枚回下迄於此

長七十餘里洲上有奉城故江津長所居蓋江自枝  
江南北分流其中洲渚相連綿延甚長古今名目互  
異析之凡九十有九總之爲百里洲荆志云府境諸  
洲皆百里洲之別名是也自江陵而下洲渚漸少兩  
岸藉堤爲防北岸至沔陽州之茅埠口南岸至巴陵  
之城陵磯堤長各五百餘里寸地失防千里爲壑是  
以江陵等處向有九穴十三口以洩漲勢後俱湮廢  
而荆州之水患日甚矣乾隆五十餘年間荆州大水  
壞城漂沒無算議者歸罪於窖金洲民謂其種柳洲  
上所致其時水已漫城兩堤無洩九十九洲皆在波

底雖無窖金一洲恐亦難免決潰故言水利於湖北宜以江陵爲先而漢沔下游安危視此矣凡二十里泊荊州府南城外東望沙市烟帆叢萃江流渺然二十二日道府各官逐晨飯後登岸自成都解纜匝月而始出峽又五日始抵荊州水路共行五千餘里至是始就陸向例星使入蜀往返由棧道嘉慶五六年間教匪蹂躪道梗改由水路後遂援以爲常峽灘雖險較之雲棧猶便易也五里過龍山寺孟嘉落帽處孟嘉爲靖節先生外祖風韻故自不凡又有高氏三王墓謂南平王季興及子從誨孫保融也今城西有

廟遂祀武信爲土主矣五里入驛館在荊州府城南子晉自湖南來兄弟隔別三年忽然相晤驚喜交集詢之已候余一月矣因言大伯父亦欲同來視余家人以其年老止之自江陵南行五百餘里卽抵余家父兄手足咫尺天涯聞此語倍爲酸楚申刻入城報謁周歷街衢城大而堅分其半爲滿洲駐防規制與西安四川相似荊州古郢中縣以江陵名而四顧無山惟西北有紀山在數十里外爲郢之鎮故又曰紀郢世本言武王熊通始遷郢史記言文王熊賁始遷郢地理志楚文王自丹陽遷郢至平王時乃因子囊

言城之蓋經營數世始定都於此又安陸亦稱古郢  
乃門廉對莫敖所言郊郢非國都也江陵歷代爲荆  
州治惟漢末晉初移荆州治襄陽而以江陵爲南郡  
六朝逮唐宋衣冠極盛明自張太岳而後繼起者畧  
罕矣是夜與子晉絮話家山四鼓乃寢

二十三日晨起送子晉歸安化子晉來往皆徒步無肩  
輿囑其至澧州買船由洞庭而南臨行戀戀揮淚而  
別余於丙寅丁卯年間主講澧陽子晉從之轉瞬遂  
數年矣荆州無車以騾載行李繞城而西昔魯肅謂  
荆楚沃野千里外帶江漢內阻山險有金城之固武

侯亦言荆州用武之國六朝江左安危恒視上游然  
蕭繹都此而命懸他氏其餘蕭銑高賴子之徒旋起  
旋覆何者荆州之勢足以俯視東南而堂奧之患乃  
在西北若歸巫與襄陽有事則患中於江陵矣是蓋  
進取之地非可守之地也其城外平行別無險阻是  
以孫吳時嘗作堰海以遏水限敵宋李師夔吳獵劉  
申所築之上中下三海卽其遺制也淳祐中孟珙引  
沮漳之水自城西繞北入漢遂通三海爲一而更爲  
八櫃以資蓄泄三百里間渺然巨浸金人望而却步  
卽俗所稱三海九隔也今故跡多湮惟東北有五子

長湖北通潛漢爲行旅舟航之利與城守無涉坡詩亦解觀形勝昇平不敢論然安不忘危守土者其可忽諸是日行五十里尖四方鋪荆門州地又四十里宿建陽驛

二十四日三十里新店鋪二十里尖團林鋪二十里掇刀石道旁有關廟一鐵刀嵌盤石上相傳關雲長自襄樊走當陽之麥城爲潘璋所獲盡節於此連日不見山至此漸入坡坨十五里鳴鳳關五里宿荆門州安陸府屬地館於龍泉書院陸九淵知州軍講學於此西直象山之麓九淵以之自號者也山上有孝隱

廟云老萊子隱處下有順泉稍南爲蒙泉泉從山根出灑灑有聲有亭刻宋黃魯直及張垓書又南爲龍泉乾隆初年知州舒某修復兩橋三閘鑿地得古碑刻紹慶壬申知州軍呂元書有風雲長護白龍宮之句因以龍名泉又南爲惠泉泉來處不可見而石沼中時有沸沫殆趵突也四泉皆清冷無纖滓江漲則渾蓋與三峽潛通矣州城無水賴四泉以及承以堰閘資灌溉焉石梁偃月上綴十亭旁植楊柳雜樹雖秋風搖落而綠波紅樹宛有林泉之趣荆門在象山東堡二山間爲南北咽喉陸九淵之言曰州南捍江

陵北援襄陽東護隨郢之脅西當光化夷陵之衝荆門固則四鄰有恃否則由唐之湖陽以趣山而涉漢已在荆門之脅由鄧之鄧城以涉漢而趣山已在荆門之腹此外間道之可馳漢津之可涉陂陀不能以限馬灘瀨不能以濡軌者所在尙多自我出奇制勝徼敵兵之腹脅者亦正在此因請於朝而城之厥後孟宗政謀復襄陽亦謂必得荆門然後可以出奇兵其意蓋原於此大儒曉事之論固非空談性命者比也

二十五日五鼓卽發天氣寒冷與峽中大異三十五里

小南橋二十五里尖石橋驛又六十里宿麗陽驛鍾祥縣地東去縣一百二十里僅一巡檢駐此抵驛後微雨自荆門至此東西皆有山從山缺處行頗有坡壟其山之最著者曰章山在荆門鍾祥交界處卽禹貢之內方也

二十六日晨霽五十里渡漳水水從南漳山中來東流至倒口入漢按漳水出南漳之荆山卽禹貢荆豫二州之界也其山四面險絕惟西南一面可通上有池漳水出焉南流合沮入江此處之漳蓋其別出者耳登岸食新店宜城地四十里宿宜城縣隸襄陽府古

鄢子國楚滅之以爲別都謂之鄢郢又縣東南有郢城左傳定六年楚令尹子西遷郢於郢是也楚初封丹陽在丹山之南卽歸州也後徙枝江又徙江陵爲郢中昭王徙郢其後仍還江陵迨頃襄王時白起燒夷陵拔鄢郢於是江陵南北陷敵不可居乃東保陳城卽今河南陳州府至考烈王徙居壽春則今安徽之壽州也蓋畏秦僞愈徙而東至於秦漢之際所謂楚人者在今安徽省之廬鳳潁泗六江蘇省之淮揚徐邳山東省之沂州河南省之光陳等處地居揚充徐豫之間與春秋時荊州之楚不侔矣宜城在漢屬

南郡曹操嘗移置荊州治先主初封宜城亭侯卽此宋玉王逸馬氏五常及段文昌父子皆邑人王阮亭謂宜城山水頑劣而多產才士不知巴蜀千巖萬壑至是始迤透平曠渣滓去而清氣來此江陵在唐所以稱衣冠藪澤而漢魏時襄陽號爲冠蓋里也宜城正復類是阮亭殆不知此

二十七日薄霧中行二十里至羅家河始見漢水風帆烟樹如入畫圖自此沿漢西上十里食小河口十里歐家廟入襄陽縣界十五里獨樹塘十五里王家集北岸正對鹿門山龐德公孟浩然所從游隱也稍西

有白沙洲酈注謂龐公與士元居其陰司馬德操居其陽望衡對宇歡情自接者矣五里轉入山徑過峴山晉太傅羊祜與從事鄒湛等嘗登此有祠在山坳間已圯瓦礫縱橫惟見豐碑四五屹立道旁峴山舊有桓宣胡巖周訪數碑惟叔子以墮淚在人猶存想像耳襄沔記紫蓋山萬山與峴山謂之三峴以此爲首故又稱峴首云五里襄陽府襄陽縣道左有唐漢陽王張柬之故園習家池在其南出北門至漢皋樓昔神女遇鄭交甫解佩於此所謂襄陽大堤也西有夫人城晉朱序鎮襄陽其母韓夫人率婢及城中女

丁築以禦侍丕者城西卽檀溪有釋道安寺溪之陽爲徐元直崔州平故居習鑿齒與謝安書云縱目檀谿念崔徐之交是也又西卽萬山一名方山水經注沔水逕隆中歷孔明舊宅北又東逕萬山北山下有杜元凱碑元凱作兩碑述己功一沈峴山水中一下之此潭也渡漢水宿樊城仲山甫封邑西魏嘗置縣南北交衝舟車換易皆必由之五方雜處轂擊肩摩與襄陽隔岸對峙猶輔車也襄陽踞東南上游扼南北咽喉歷代皆爲重鎮宋人有言守江左則襄陽不如建業圖中原則建業不如襄陽然歷觀古來如桓

宣庚翼孟珙之守襄陽非不力圖恢復皆無寸進之效惟關雲長水滸樊城一時威震許都亦終敗亡而如杜預平吳于謹滅梁蒙古亡宋皆由襄陽以成破竹之勢何者襄陽雖堅已在荆郢堂奧北人得之足以俯并東南南人得之僅足以自保而已是以春秋時楚守宛葉不聞守襄陽也楚雄南服而長中原其伐謀固非後世所及晚晤石編修鏡心將以詰朝北上石借聶太史銑敏典試貴州聶時假歸衡山故未同來

二十八日以收拾行李易爲乘留住樊城一日自樊

而北兩舍卽入河南境晚晤雲南學政程編修壽齡余庚申壬戌鄉會試同年也時方赴滇 湖北一省西北阻山東南臨水居水陸之衝要爲南北之喉膺險要所在節節皆關形勝禹貢厥土塗泥田居下中而後世言魚稻之利顧言湖廣熟天下足良由人力劬而堤垸之利普也二南之化始自江漢其人健銳有德易興而輕果之風亦所難免漢魏以來襄郢一帶衣冠極盛近則文風首推武漢黃三屬而安陸荊州德安沔陽次之襄陽遠不逮矣地雜五方接連宜鄖頗易藏奸守土者宜知所綢繆哉



二十九日晨大霧自樊城北行二十里桐樹店過小水曰新河二十里柳堰又二十里尖呂堰驛古鄆子國有偃城雲長圍樊遣兵屯偃城徐晃自宛赴救詭道欲絕其後遂得偃城又宋紹定六年金將武仙寇光化孟珙追敗之於呂堰卽此教匪起事時首被焚躡余壬戌冬過之行旅猶有戒心近則塵居復舊矣二十五里黃渠河入河南新野界十五里新店渡白河一名唐河卽清水也二十里宿新野縣古謝邑申伯番番旣入于謝是也六朝諸庾皆縣人

三十日濱白河行一路風帆絡繹二十里沙店鎮五里

入南陽縣界十五里趙店鎮二十里貴人鄉光武故里  
里有碑十里食瓦店西北望卧龍岡遥遥若接上有武侯草廬侯躬耕隆中在襄陽之西所謂南陽者蓋墟集之名此處衝衢旁無林壑兵戈擾攘之際殆難龍德而隱也凡六十里宿底店西距府縣治僅五里晚寒甚風自窗櫺入砭人毛髮南陽爲周申呂鄧三國地府治卽宛城址也習鑿齒云秦并天下自漢以南爲南郡自漢以北爲南陽然國策載秦惠王時楚魏戰陘山魏許秦以上洛敗楚南陽又吳越春秋內傳勾踐賜文種屬鏤之劍歎曰南陽之宰而爲越王

之擒蓋種郢人令於宛故云然是則南陽之稱不自秦并天下始矣其地南蔽江漢北顧中原西通商洛東臨隨汝險阨而平可戰可守楚巫臣言申呂爲賦以禦北方若無申呂諸侯必至於漢是也大約春秋時楚最講戰守夷陵國之西門乃不守夷陵而守夔巫幽崖窮谷之中而爲宮臺以時巡幸所以重西防也襄陽國之北門乃不守襄陽而守宛葉兵車時出居然問鼎中原此與武侯守蜀屯漢中而出祁山同一機法非徒顧目前者所知自項襄時司馬錯拔楚黔中楚獻漢北及上庸地於是宛葉樊鄧隨房之境

悉入於秦明年白起遂伐楚一戰舉鄢郢再戰燒夷陵而郢危矣謀國不臧自撤籬籬誰之咎哉然楚雖削弱王翦以空國之師倖而取之而秦亦終亡於楚七國之久未有如楚與燕者而楚尤強盛卜世卜年與周室相終始雖祝融氏之光遠有耀抑其先規爲措置固有異於列國者歟

十一月初一日早發途間聞爆竹聲殊增歲暮之感濱唐河行二十里北新店二十里夏向鋪西北有山徑可通汝洛古三鴟路也二十里博望驛漢張騫封邑十五里龍貴橋入裕州界十里趙河鋪卽堵水源出

州西山麓南流四十里至葉家店始通舟楫至唐縣界入比又西與清合而入於漢或云此水卽召渠召信臣故迹也宋唐州守趙尙寬修復之溉田甚多人因謂之趙渠按酈注比水又南趙醴二渠出焉則趙渠之稱久矣三十五里宿裕州途中涉小水凡數次皆南流入趙河裕州楚之方城漢堵陽地朱祐封邑堵音赭故又稱赭陽後魏置方城縣并置襄城郡唐改北澧州又改唐州金爲裕州州據宛葉之間爲南北咽喉淮南子天下九塞方城其一左傳晉陽處父伐楚以救江門于方城荀偃伐楚侵方城之外或云

方城山名連接南陽唐葉之境荆州記謂方城南北連綿數百里亦謂之長城也

初二日自裕州北行二十里招撫岡俗訛趙福岡此處爲中幹過脈之所岡以北水皆北流注舞陽河入汝岡以南水皆南流注趙河入清也宋太宗初轉運使程能請濬白河達京師以通襄漢之漕塹山堙谷凡月餘抵方城地勢高水不能至端拱初復議開濬卒不就蓋由不識地脈故開鑿徒勞矣十里扳倒店有光武廟建武二年堵陽人董訢反宛城堅鐔攻拔之訢走還堵陽明年帝自將至堵陽訢降此其屯兵納

降處亦卽招撫岡所由名也二十里涉龍泉水其水從裕州西龍泉山來經鐵爐大河口至此又東入無此水可淬劍故曰龍泉之劍爲楚寶也酈注謂在無水下游西平縣似悞酈注又云滎水上承堵水東北至無陰縣會無是龍泉亦可稱堵水也十里保安驛入葉縣界連涉兩小水不知其名按水經注醴水又東與葉西陂水會水出縣南方城山頂有湧泉葉公塌以爲陂陂水散流東逕葉城南入醴然則此水古但言葉西散流本無專稱也二十里至舊縣春秋時楚北要地有問政書院祀沈諸梁唐開元中以王喬

嘗令葉因析置仙鳧縣後廢故稱舊縣相傳有仙人王子喬墓仙而有墓可爲學仙者警矣涉醴水水出魯山縣至是東注舞陽河又北會澠入于汝酈注北澠水出雉衡山逕葉縣卷城東入無又曰汝水東得醴水口醴水東南逕葉縣故城北蓋醴澠通用也三十里過昆水宿葉縣春秋楚遷許於葉卽此漢曰昆陽以昆水得名源出縣西青山麓其流甚微

初三日大風天明乃行十里過黃城山塊然一土阜在路西又北有石阜曰鵝羊山聖賢冢墓記葉黃城山是長沮桀溺耦耕之所有東流水則子路問津處尸

子楚狂接輿耕於方城或謂卽此一名苦菜山見水  
經注十里渡泄水泄出魯山縣之堯山劉累所居東  
南流入縣境東與無會而入汝也本與汝水同出而  
復會故又稱汝濱爾雅汝出爲濱是已俗名沙河又  
訛曹江左傳楚伐鄭次魚陵涉於魚齒之下酈道元  
謂所涉卽泄水也又僖公時楚人與晉師夾泚水而  
軍泚亦泄也光武擊王莽將王尋王邑於昆陽會大  
雷雨泄水盛溢虎豹皆股戰士卒溺死泄水爲之不  
流其戰處當在黃城一帶渡水入襄城境五十里辛  
店二十五里宿襄城縣隸許州春秋鄭汜邑後屬楚  
爲西不羹靈王大城陳蔡不羹是也京相璠謂周襄  
王出鄭居汜故曰襄城不知莊子載黃帝登具茨訪  
大騶命駕於襄之野七聖皆迷是襄之名邑不因周  
主矣今城南五里許有問道橋卽軒轅舊迹汝水在  
城南水發源魯山縣經汝郊裕葉之境至此始通舟  
楫凡行千三百里至安徽境與潁俱入於淮中間屢  
遭河患與潁時分時合故道多不可考矣又有湛水  
從襄城上游注之故汝水亦兼湛水之稱周禮荊州  
其浸潁湛是也襄城山勢屹然爲荆豫門戶出城而  
北地益平曠驚沙撲面與南方風景別矣行陂疇間

凡二十里至林水鋪古汾邱地楚子庚伐鄭治兵於  
汾卽此又二十里宿潁橋潁考叔爲潁谷封人有大  
隧故蹟或曰古汾邱當在此國策楚北有汾涇之塞  
與信陽州之冥阨直轅俱爲南北要隘也

初四日五鼓卽發渡潁水源出登封縣陽乾山逕禹州  
入境東至周家口與汝水合而復分又東至安徽壽  
州之正陽關入淮凡行一千五百里豫河自洛陽以  
東惟汝潁最大諸水皆入之五十里尖石固鎮長葛  
地南爲許州境十里尙友堡入新鄭界二十里會河  
鋪過潁水源出少室東流入潁途中西望可見鞏洛

諸山三十里涉洧水亦出密縣馬嶺山流至縣西與  
溱水合總名爲溱洧卽子產乘輿濟人處溱一作澮  
酈注洧水又東南流澮水注之是也又南逕鄭東門  
外有洧淵又南逕長葛西華境入潁謂之閔河宋開  
寶中賜名惠民者也渡溱洧入新鄭縣開封府屬世  
紀縣故有熊氏之墟黃帝所都鄭氏徙居之世本陸  
終娶鬼方氏妹曰女隤孕三年啟左右脅生六子其  
四曰萊言是爲郟人郟人者鄭是也竹書桓公伐郟  
克之乃居鄭父之邱據此則桓公初封本未稱鄭及  
得郟國實鄭地因易舊稱爲新鄭耳桓公避難東遷

乃不居號而居鄆險無可守宜乎晉楚之師交臨城下也

初五日四鼓即發四十里尖郭店十里袁堡入鄭州界十里涉三十里河凡兩涉蓋即酈注不家溝水流逕管城西謂之管水東北分爲二水一入黃淵一入甫田者也三十里鄭州古祝融氏之墟周封管叔於此今有管城驛左傳晉師救鄭楚子次於管以待之今城東六里有邲城卽荀林父敗處戰國韓滅鄭嘗徙都焉六朝逮唐爲滎陽郡鄭氏其望也由城西過古僕射陂有裴晉公墓涉甫水其源卽鴻溝一名渠水

水經渠水出滎陽北河注云自河與濟亂流東逕滎澤北歷中牟之圃田竹書梁惠成王十年入河水於甫田又爲大溝而引甫水是也東會不家溝水爲白溝又東會清人城水卽詩所稱清人在彭者矣凡四十里宿岡李驛滎澤地西去縣十里舊治黃河濱康熙丁丑因避衝決移置西阜乾隆甲申裁河陰縣省入禹貢沈入河溢爲滎楚漢時猶存舊蹟謂之鴻溝高祖與項羽劃溝爲界自滎以西爲漢自滎以東爲楚王莽時旱涸後遂墜爲平地僅存涓涓細流矣初六日因候夫馬留住岡李

初七日自岡李登河堤十里至黃河濱水已落渡口西  
徙距廣武山在指顧間柴以西無河患以此山爲之  
障拒也又西卽敖倉矣渡甫畢西北風大作揚沙塞  
路籃輿搖搖不能定以四人夾持之凡三十里過堤  
至原武縣之王祿集而暝又二十里宿亢村驛繼之  
以霰是日風殊勁渡少緩必且臨河而返矣亢村獲  
嘉地隸衛輝府東距縣三十里本修武地春秋時甯  
邑漢爲汲郡中鄉武帝東巡適南越破獲其相呂嘉  
首因以名縣

初八日晨起衝風而行六十里尖新鄉縣古鄘國西望

可見太行衛河發源輝縣蘇門山謂之百泉羣水盛  
沸瀦而成陂溉田千頃南流逕縣城東北趨汲境東  
爲淇門口通漕至山東之臨清州由天津入海俗呼  
運糧河霍韜謂卽古黃河故道也按水經清水出修  
武縣黑山過獲嘉縣北又東過汲縣入河又統志沁  
河故道自懷慶府武陟縣入獲嘉境下接新鄉東北  
接汲縣界北抵清河今此二水皆不入衛從武陟之  
清化鎮南入于黃矣然地勢建瓴每遇漫漲衛輝所  
屬多罹水患明代嘗議引沁入衛以利清河漕因衛  
河身小恐不能容遂止五里駱駝灣四十五里宿衛



輝府汲縣殷朝歌牧野境周以殷墟封康叔爲衛府東北有故邶城與新鄉之鄘城並衛地春秋時衛爲翟滅徙居楚邱在潞滑之間而殷墟旋入於晉馬季長謂晉地自朝歌以北至中山爲東陽朝歌以南至軹爲南陽是也孔子三至衛當在楚邱此南門外有擊磬處似出傅會衛輝明潞王封國城內有潞王臺頗高峻又西有君子鄉卽蘧伯玉故里比干墓在北岡外衛河自碭谿流經城北而東舊有太公廟酈注謂太公汲人也

初九日十里黃土岡過比干墓有祠在西山麓所謂左林右泉後岡前道也十里頓坊店詩送子涉淇至于頓邱卽此十里入淇縣界涉王莽河未悉命名所由按淇右古有肥泉又有馬溝美溝而美溝出自山嶸流注馬溝其入淇之處爲肥是仍逶迤一水也或卽此河矣十里尖淇縣本沫邑盤庚自奄遷此爲殷都紂作新聲靡樂因號邑曰朝歌晉灼曰朝歌者歌不時也今城內有鹿臺鉅橋又有三仁祠晤同年符鴻時爲淇令淇與汲縣延津考城爲豫省四苦缺而淇尤褊小廣袤不及古子男出北門五里過斲脛河二十里高家集渡淇水源出輝縣共中山山海經所謂

沮洳山也北逕湯陰縣入境又東至濬縣界爲淇門  
口入于衛河詩瞻彼淇澳棊竹猗猗自漢武帝取淇  
園竹塞決河寇恂伐淇川竹治矢百萬輸軍資而竹  
盡矣酈道元言通望淇川惟王芻編草今則王芻編  
草亦復無之可慨也已十里大程店十五里黃家溝  
濬縣地卽黃雀溝古有黃橋晉成都王穎起兵於鄴  
討趙王倫前鋒至黃橋爲孫會等所敗卽此十里宜  
溝驛彰德府湯陰縣地卽朱亥椎殺晉鄙處相傳子  
貢生此子孫今居濬縣

初十日二十里光村舖過嵇侍中祠紹爲叔夜子而效  
死典午可謂人間讀史各君臣矣惠帝血衣勿洗一  
語豈無知所能道官蛙肉糜之說殆難盡信五里入  
湯陰城拜岳忠武廟鵬舉湯陰人也出城過河陽橋  
唐乾元二年史思明援安慶緒於鄴九節度之師潰  
而南郭子儀斷河陽橋卽此有堯君素祠君素隋將  
守城死唐贈勅云跣犬吠堯有乖倒戈之志疾風勁  
草彌表歲寒之心橋下卽湯水古作蕩縣以名焉十  
五里羨河舖羨出縣西鶴山下經防城亦兼防水之  
稱東與蕩水會入洹文王囚羨里卽此過愁思岡入  
安陽境曹子建嘗登之而悲吟也石晉末少帝爲契

丹所執至此飲酒因訛爲愁死岡十五里魏家營曹操屯兵處二十里彰德府安陽縣古相河直甲所都戰國爲魏鄴地後屬趙始皇十六年桓齮攻趙取鄴安陽是也城內有韓魏公書錦堂安陽負山臨水氣勢恢雄居河朔之樞扼南北之要自古龍戰之地也出城五里安陽橋過洹水源出長子縣東流入衛項羽與章邯盟此水上卽魯聲伯夢瓊瑰者也過七里岡古韓陵舊有溫子昇碑徐陵謂止有韓陵一片石可共語三十五里宿豐樂鎮稍東有銅雀臺遺址又東入臨漳縣地卽古鄴都矣 河南一省前淮後漳

大河中貫時有水患地勢平做四通五達其險在外所謂四戰之區也五穀所殖自給有餘風氣平和民俗質渾故州以豫名然歸汝陳光之境頗多究民彰德衛輝夙稱勁悍語其形勝則陝州信陽南陽爲西南奧窔而河北三郡尤汴洛之扞衛矣

十一日從豐樂鎮渡漳河入直隸境漳有二源一出山西長子縣之發鳩山爲濁漳從林縣南來一出樂平廢縣之大黽谷爲清漳從涉縣北來至隆慮山下合而爲一其合處近安陽界謂之交漳口東至臨漳入大名境而衛河自內黃來會之北過館陶至臨清州

入運河漢志謂漳水共行千六百八十里自西門豹  
史起引漳灌田曹孟德復導以通漕而利益溥矣三  
十里尖磁州舊隸彰德雍正四年改屬直隸廣平府  
以州有滏水州民存畛域之見閉閘築壩鬻水罔利  
怡賢親王興修水利時因而奏改也滏出州西神麇  
山下流逕邯鄲入永年厯曲周雞澤等縣溉稻田十  
數萬畝下達子牙河舟楫往來民商均利今磁城外  
稻田連陌花柳夾渠宛有江南風景二十里杜店漢  
杜喬故里五里車騎關十里臺城鋪入邯鄲界岡路  
崎嶇相傳古趙王城也二十里宿邯鄲縣邯山名在  
縣東張晏云鄲盡也言邯山至此而盡春秋時爲衛  
地後屬晉戰國時趙肅王徙都之蘇秦謂山東之國  
莫強於趙古蹟甚多皆無可尋憶岑參詩傷心叢臺  
下一帶生秋草爲之慨然

十二日出北門過學步橋邯鄲人善走其學步時囊沙  
繫兩腓間急則解脫輕便如飛每採取朝士遷擢及  
考試捷音倍道至其家索賞能日行四百餘里謂之  
邯鄲報云二十里黃梁夢有呂仙廟十里界河鋪入  
永年界東距縣四十里十五里臨洺關冉伯牛故里  
有祠有小城駐通判一員漢易陽縣治唐置臨洺縣

有路可通山西之澤潞唐魏博節度使田悅叛攻臨  
洛馬燧自壺關進擊大敗之又興元初昭義帥李抱  
真軍于臨洛與王武俊共救魏博却朱滔兵卽此飯  
後涉洛水遇同年方同煦時赴宜君縣任詢以京邸  
消息俱平善洛水出遼州東流入漳唐太宗敗劉黑  
闥兵二萬人入洛卽是水也十五里搭連店入沙河  
界卽渴水其源亦出遼州入洛二十里沙河縣途中  
四望無人烟惟有白沙一片積成邱阜馬行其中喘  
汗交迫五步一憩不勝其憊昔 聖祖西巡經  
此憫其荒瘠遂 諭令永免驛差焉十里食饈

鋪東北五里許有梅花亭唐宰相宋璟祠墓在焉顏  
真卿書碑尙存入邢臺界十里富莊鋪十里宿順德  
府邢臺縣祖乙遷邢卽此齊桓公遷邢於夷儀在西  
北山嶺上秦爲鉅鹿郡項羽大破秦軍虜王離於此  
後以封張耳改爲襄國後趙石勒據之唐曰邢州元  
改今稱府北控恒山西憑上黨南臨相衛東俯三齊  
振裘挈領四顧稱雄張賓有言襄國依山憑險形勝  
之國也李綱亦云邢與定州地大力豐如太行之兩  
翼

十三日二十里白塔村又十里馮唐故里入內邱界有

孔子遇程子傾蓋語處又三十里尖內邱縣二十里過泝水俗呼王馬河流出元氏縣東至臨城境與源出贊皇山之沙水會南流逕唐山任縣境入內邱又東入於滹山海經敦輿山泝水出其陰東注於彭水彭卽沙也一名沛水五里任村五里麒麟舖原名野狐岡臨城地西距縣二十里五里入柏鄉界二十里宿柏鄉縣隸趙州

十四日出柏鄉二十里有光武斬石人處相傳世祖爲王郎所追夜迷失道聞人語問之不荅斬之乃石人也與高祖斬蛇事相類而史氏不載五里故城店或曰故鄆城也趙武靈王言中山侵掠吾地引水圍鄆卽此光武卽位於鄆南在此城之南今高邑也此處有老河身霖潦時爲害元代嘗鑿之爲新溝河今仍淤矣十里野鷄舖涉小沙水入趙州界二十里大石橋過清水河下流爲涑河朝野僉載趙州石橋望之如新月出雲長虹飲澗蓋隋大業中石工李春所建俗傳魯般非也五燈會元正覺晚見五祖於海會出問未知關捩子難過趙州橋卽指此五里尖趙州漢鉅鹿常山地六代及唐爲趙郡州倚太行而帶衡漳東逮隆平鉅鹿寧晉一帶卽古大陸之野也城內白

林寺壁有吳道子畫水軒然大波頗得氣勢正不必以贗作爲疑二十里水寨鋪入欒城界二十里宿欒城縣晉欒武子食邑縣署旁有蘇頲濱墓按蘇氏由趙郡徙眉州故文定集曰欒城與文忠俱葬汝州乾隆十年九月庚寅特旨除河南鞏郟二縣宋臣蘇軾蘇轍護墳地畝額稅是文定不葬欒城明甚好事者爲之耳

十五日自欒城二十里冶河鋪卽井陘之綿蔓水也流經平山縣東南至此又南合洩河至寧晉入大陸澤酈注斯洩水首受太白渠太白渠首受綿蔓水綿蔓

水上承桃水桃水出上艾縣合并陘水世謂之鹿泉水者也由井陘入平山境始名冶河元史滹沱與冶河初不相通後二水合流其勢始盛因分引冶河南出滹沱患稍減至大初滹沱決仍合於冶自是數有決溢之患皇慶中議自平山改闢河道下至寧晉使冶水仍入舊河又於欒河縣北聖母堂東開減水河一道以殺其勢未幾復廢此蓋其故瀆也十里荆壁鋪入正定界西爲獲鹿地三十里渡滹沱時河水已冰中流一線錚錚有聲余自天貺後日渡滹沱而西至是將近半載磨牛重踏陳跡宛然而冬夏之氣亦

備矣尖正定府正定舊名真定俗傳爲秦始皇諱然始  
皇名政不名正何以不諱政而諱正蓋三正之正本  
音平聲非爲秦諱也四十里宿伏城驛

十六日自伏城北行十里經藁城地五里涉木刀溝入  
新樂界溝水出平山縣亦名袈裟水縣境湧泉海泉  
諸水皆瀝入可以灌溉東有大流村牛家溝皆田也  
三十里渡浩河一作郜尖新樂縣二十五里明月店  
出新樂界二十五里過定州州西六十里曲陽縣卽  
北岳恒山所在太行自衛輝西界綿亘而北行千數  
百里嵯峨萬仞如一線長城至曲陽以北而華萼競

呈倍增雄傑矣十五里渡唐河唐水西納恒山各澗  
故又稱恒水禹貢恒衛旣從是也相傳東坡守定州  
始教民引唐河墾田至今利之又十五里宿清風店  
已三鼓矣

十七日寒重輿夫匿弗出天明始行三十里望都縣縣  
有都山一名孤山張晏云堯山在北堯母慶都山在  
南登堯山見都山故縣以爲名十五里膏腴舖完縣  
地十五里方順橋滿城地滿城古北平縣也水經注  
光武追銅馬五幡於北平破之於順水卽此十里涇  
陽驛十里郭村天已暝騎行三十五里宿保定府



十八日雨霰住清苑

十九日五十里晨尖安肅縣又三十里故城鋪又三十里渡白河按范成大北使錄自安肅軍出北門十五里至白溝河又一百五里至涿州彼時安肅城當在故城一帶而渡口在稍西故距河僅十五里也遼宋以白河爲界故安肅尤爲宋邊要地所築砦曰銅梁門曰鐵隧城言其堅也咸平二年契丹攻隧城守將楊延昭拒却之城邑考謂安肅有夾河二城楊延昭修以拒契丹又縣西有楊山相傳楊延昭藏兵處楊氏世守北關流俗猶能言之紫荆關在縣西易州境

北通宣大與居庸倒馬稱內三關而山西之寧武偏頭鴈門爲外三關皆燕都之衛也十里宿定興縣二十日七十里尖涿州出城不數里輿夫遯乃秉炬騎馬行四十五里過寶店入良鄉境又二十五里至縣時廣西主考彭春農賀藕耕二君已先至彭亦因夫逃騎馬傷足蓋行路之難如此自涿以北夫役皆自募往往得值卽遜濱河之民掘坑陷車以索賄皆應整飭

二十一日尖長新店過盧溝橋余辛酉計偕至盧溝道中望京城有詩云太平一代鞏金甌龍虎森嚴體勢

道地接東瀛涵王氣天臨北斗奠

皇州八方風

雨三階應萬里河山兩戒收始識

帝王乘御處

祥烟葱鬱滿城浮十年前景况宛然在目而楊柳雨

雪又添一段鴻爪因緣矣哺入城

二十二日四鼓詣

西苑恭復

恩命蒙

召見

於瀛臺

天語垂詢良久奏對別記

白門吳儀董葉

蜀輶日記後序

右蜀輶日記四卷吾師長沙公主考四川塗次之所輯也謹按小雅皇皇者華之首章駢駢征夫每懷靡及毛傳訓懷為和鄭箋以和為私字之誤言受君命當速行不得懷私相稽留其說頗隘夫君言不宿使臣之恒節何足復相勗勉靡及云者深慮德澤有所未被聲教有所不達馳驅況瘁之暇又當採風謠問疾苦以為歸朝之獻故以下四章咨諏咨謀咨度咨詢如此其辭繁不殺蓋聖主賢君所望於其臣有出於使事之外者即箋所謂揚君之美延其譽於四方猶未足以盡此詩之悒

也今館閣諸公閒三歲一出典直省試其返  
命也征塗所經置吏賢否年穀豐歉  
清問所及至周至悉而豈徒峻關防勤校閱以是爲盡  
心焉爾哉吾師自翰林遷御史給事中屢上封事爲  
睿廟所嚮用  
今上登極遂膺封圻之寄或徒見受  
任之逾等而不知公之所自命與其所學蓄積於文學  
待從之日者爲已久也公著述繇富是書裁五萬餘言  
而建置之沿革郡邑之利病民氣之淳澆山川形勢之  
險易道里之遠近源流本末粲然畢具夫造

剡沃

心之語外庭不得聞然而咨謀詢度之詳慎書思對命  
之所取資於此已略可識矣使繼輅早得而讀之或卽  
能窺見吾師天下已任之志惜受知較晚乃言之於己  
然爲可憫也道光四年十月受業陽湖陸繼輅書後

皇朝日記後序  
皇朝日記後序  
皇朝日記後序  
皇朝日記後序  
皇朝日記後序  
皇朝日記後序  
皇朝日記後序  
皇朝日記後序  
皇朝日記後序  
皇朝日記後序


跋

右蜀輜日記四卷吾師

雲汀老夫子典試四川時記往返之程途城邑之閱歷與夫山川之形勝民生之利病人物古蹟之所流傳而溯其源委正其譌誤蓋與皇華集數百篇同一時作而各自成帙昔太史公西至崆峒北過涿鹿東漸於海南被江淮而文章益奇杜陵入秦歷蜀出瞿唐下江陵泝沅湘以登衡山而詩益工彼蓋借助於名山大川以發其胸中浩瀚無涯之氣而適得如其意之所欲言亦各有取爾也壬午之夏吾師曾以皇華集見示旣得受而

讀之今復得讀此記四卷始知古人之偏長獨至尙有  
不足言者他日得有餘暇將合而刻之以貽惠後來受  
業涇縣趙紹祖謹跋

天保十辰



四卷書

